

四庫全書

史部

欽定四庫全書

史部

春秋左傳事類始末

卷五  
附錄

詳校官編修臣翟槐

編修臣裴謙覆勘

總校官知縣臣繆琪

校對官編修臣饒慶捷

謄錄監生臣姚希慶

欽定四庫全書

春秋左氏傳事類始末卷五

宋 章冲 撰

定公

二年

邾莊公下急而好潔

邾莊公與夷射姑飲酒私出

亡酒

闔乞肉焉奪之杖以敲

之三年二月辛卯邾子在門臺臨廷闔以餅水沃廷

邾子望見之怒闔曰夷射姑旋焉命執之弗得滋怒自

投于牀廢于爐炭爛遂卒先葬以車五乘殉五人

欲藏中潔

故先車乘別為便房蓋其遺命莊公下急而好潔故及是

四年

劉文公合諸侯于召陵長衛侯於盟

劉文公合諸侯于召陵謀伐楚也將會衛子行敬子言于靈公曰會同難嘖有煩言莫之治也其使祝佗從公曰善乃使子魚子魚辭曰臣展四體以率舊職猶懼不給而煩刑書若又共二徼大罪也且夫祝社稷之常隸

也社稷不動祝不出竟官之制也君以軍行祓社釁鼓  
祝奉以從於是乎出竟若嘉好之事君行師從卿行旅  
從臣無事焉公曰行也及臯鼬將長蔡於衛衛侯使祝  
佗私於萇宏曰聞諸道路不知信否若聞蔡將先衛信  
乎萇宏曰信蔡叔康叔之兄也先衛不亦可乎子魚曰  
以先王觀之則尚德也昔武王克商成王定之選建明  
德以藩屏周故周公相王室以尹天下於周為睦分魯  
公以大路大旂夏后氏之璜黃封父之繁弱殷民六族

條氏徐氏蕭氏索氏長勺氏尾勺氏使帥其宗氏輯其

分族將其類醜以法則周公用即命于周是使之職事

于魯以昭周公之明德分之土田陪倍也敦厚也祝宗卜史

備物典策官司彝器因商奄之民命以伯禽而封於少

皞之虛分康叔以大路少帛雜帛綉步旃旃旌綉大赤

大吕殷民七族陶氏施氏繁氏錡氏樊氏饑氏終葵氏

封畛土略自武父以南及圃田之北竟取於有閭之土

以共王職取於相土之東都以會王之東蒐湯沐邑聃季

授土陶叔授民命以康誥而封於殷虛皆啓以商政疆

以周索分唐叔以大路密須

國名

之鼓闕鞏沽洗懷姓九

宗

唐之餘民  
九宗一姓

職官五正命以唐誥而封於夏虛啓以夏

政疆以戎索三者皆叔也而有令德故昭之以分物不

然文武成康之伯猶多而不獲是分也唯不尚年也管

蔡啓商基間王室王於是乎殺管叔而蔡蔡叔以車七

乘徒七十人其子蔡仲改行帥德周公舉之以為已卿

士見諸王而命之以蔡其命書云無若爾考之違王命

也若之何其使蔡先衛也武王之母弟八人周公為大  
宰康叔為司寇聃季為司空五叔無官豈尚年哉曹文  
之昭也晉武之穆也曹為伯甸非尚年也今將尚之是  
反先王也晉文公為踐土之盟衛成公不在夷叔其母  
弟也猶先蔡其載書云王若曰晉重魯申衛武蔡甲午  
鄭捷齊潘宋王臣莒期藏在周府可覆視也吾子欲復  
文武之略而不正其德將如之何長宏說告劉子與范  
獻子謀之乃長衛侯於盟



鄭子大叔卒

反自召陵鄭子大叔未至而卒晉趙簡子為之臨甚哀  
曰黃父之會夫子語我九言曰無始亂無怙富無恃寵  
無違同無敖禮無驕能無復扶怒無謀非德無犯非義

五年

魯陽虎之亂

季平子行東野還未至卒于房陽虎將以璵璠斂仲梁  
懷弗與曰改步改玉陽虎欲逐之告公山不狃不狃曰

彼為君也子何怨焉既葬桓子行東野及費子洩為費  
宰逆勞於郊桓子敬之勞仲梁懷仲梁懷弗敬子洩怒  
謂陽虎子行之乎九月陽虎囚季桓子及公父文伯而  
逐仲梁懷冬十月殺公何藐盟桓子於稷門之內庚寅  
大誚逐公父獸及秦遄皆奔齊六年二月公侵鄭往  
不假道於衛及還陽虎使季孟自南門入出自東門舍  
於豚澤衛侯怒使彌子瑕追之公叔文子老矣輦而如  
公曰尤人而效之非禮也昭公之難君將以文之舒鼎

成之昭兆定之鞏鑑苟可以納之擇用一焉公子與二三臣之子諸侯苟憂之將以為之質此羣臣之所聞也今將以小忿蒙舊德無乃不可乎大姒之子唯周公康叔為相睦也而效小人以棄之不亦誣乎天將多陽虎之罪以斃之君姑待之若何乃止夏季桓子如晉陽虎強使孟懿子往晉人兼享之孟孫立於房外謂范獻子曰陽虎若不能居魯而息肩於晉所不以為中軍司馬者有如先君獻子曰寡君有官將使其人鞅何知焉獻

子謂簡子曰魯人患陽虎矣孟孫知其釁以為必適晉故強為之請以取入焉 七年齊人歸鄆陽闕陽虎居之以為政 八年季寤公鉏極公山不狃皆不得志於季氏叔孫輒無寵於叔孫氏叔仲志不得志於魯故五人因陽虎陽虎欲去三桓以季寤更季氏以叔孫輒更叔孫氏已更孟氏冬十月順祀先公而祈焉辛卯禘於僖公壬辰將享季氏于蒲圃而殺之戒都車曰癸巳至成宰公斂處父告孟孫曰季氏戒都車何故孟孫曰吾

弗聞處父曰然則亂也必及於子先備諸與孟孫以壬辰為期陽虎前驅林楚御桓子虞人以鉞盾夾之陽越殿將如蒲圃桓子咋謂林楚曰而先皆季氏之良也爾以是繼之對曰臣聞命後桓子曰何後之有而能以我適孟氏乎孟氏選國人之壯者築室於門外林楚怒馬及衢而騁陽越射之不中築者闔門陽虎劫公與武叔以伐孟氏公斂處父帥成人與陽氏戰于南門之內弗勝又戰于棘下陽氏敗陽虎說甲如公宮取寶玉大弓

以出舍于五父之衢公斂陽請追之孟孫弗許陽欲殺桓子孟孫懼而歸之陽虎入于謹陽關以叛 九年夏

陽虎歸寶玉大弓六月伐陽關陽虎使焚萊門師驚犯之而出奔齊請師以伐魯曰三加必取之齊侯將許之鮑文子諫曰臣嘗為隸於施氏矣魯未可取也上下猶和衆庶猶睦能事大國而無天災若之何取之陽虎欲勤齊師也齊師罷大臣必多死亡已於是乎奮其詐謀夫陽虎有寵於季氏而將殺季孫以不利魯國而求容

馬親富不親仁君馬用之君富於季氏而大於魯國茲陽虎所欲傾覆也魯免其疾而君又收之無乃害乎齊侯執陽虎將東之陽虎願東乃囚諸西鄙載葱靈而逃追而得之囚於齊又以葱靈逃奔宋遂奔晉適趙氏仲尼曰趙氏其世有亂乎

八年

定公侵齊門于陽州

公侵齊門于陽州士皆坐列曰顏高之弓六鈞皆取而

傳觀之顏息射人中眉退曰我無勇吾志其目也師退  
冉猛偽傷足而先其兄會乃呼曰猛也殿苦越生子將  
待事而名之陽州之役獲焉名之曰陽州

魯始尚羔

齊國夏高張伐我西鄙晉士鞅趙鞅荀寅救我公會晉  
師于瓦范獻子執羔趙簡子中行文子皆執鴈魯於是  
始尚羔

衛叛晉



齊侯鄭伯盟于鹹。徵會于衛。衛侯欲叛。晉諸大夫不可。

使北宮結如齊。而私於齊侯。曰：「執結以侵我。」齊侯從之。

乃盟于瑱。

七年

晉師將盟衛侯于鄆。澤趙簡子曰：「羣臣誰

敢盟衛君者？」涉佗成。何曰：「我能盟之。」衛人請執牛耳。成

何曰：「衛吾溫原也。焉得視諸侯？」將畝。涉佗援衛侯之手。

及挽衛侯。怒王孫賈趨進曰：「盟以信禮也。有如衛君。其

敢不唯禮是事而受此盟？」衛侯欲叛。晉而患諸大夫。王

孫賈使次于郊。大夫問故。公以晉詬語之。且曰：「寡人辱

社稷其改卜嗣寡人從焉大夫曰是衛之禍豈君之過也公曰又有患焉謂寡人必以而子厚與大夫之子為質大夫曰苟有益也公子則往羣臣之子敢不皆負羈紼以從將行王孫賈曰苟衛國有難工商未嘗不為患使皆行而後可公以告大夫乃皆將行之行有日公朝國人使賈問焉曰若衛叛晉晉五伐我病何如矣皆曰五伐我猶可以能戰賈曰然則如叛之病而後質焉何遲之有乃叛晉晉人請改盟弗許秋晉士鞅會成桓公

侵鄭遂侵衛 九年秋齊侯伐晉夷儀敝無存之父將  
室之辭以與其弟曰此役也不死反必娶於高國先登  
求自門出死於雷下東郭書讓登犂彌從之曰子讓而  
左我讓而右使登者絕而後下書左彌先下晉車千乘  
在中牟衛侯將如五氏卜過之龜焦衛侯曰可也衛車  
當其半寡人當其半敵矣乃過中牟中牟人欲伐之衛  
褚師圃亡在中牟曰衛雖小其君在焉未可勝也齊師  
克城而驕其帥又賤遇必敗之不如從齊乃伐齊師敗

之齊侯致襍媚杏於衛齊侯賞犂彌辭曰有先登者臣從之暫幘而衣狸製公使視東郭書曰乃夫子也吾貺子公賞東郭書辭曰彼賓旅也乃賞犂彌齊師之在夷儀也齊侯謂夷儀人曰得敝無存者以五家免乃得其尸公三襚之與之犀軒與直蓋而先歸之坐引者以師哭之親推之三 十年晉趙鞅圍衛報夷儀也初衛侯伐邯鄲午於寒氏城其西北而守之宵燭及晉圍衛午以徒七十人門於衛西門殺人於門中曰請報寒氏之

役涉佗曰夫子則勇矣然我往必不敢啓門亦以徒七十人旦門焉步左右皆至而立如植日中不啓門乃退反役晉人討衛之叛故曰由涉佗成何於是執涉佗以求成於衛衛人弗許晉人遂殺涉佗成何奔燕君子曰此之謂棄禮必不鈞詩曰人而無禮胡不遄死涉佗亦遄矣哉十三年齊侯衛侯次于垂葭使師伐晉將濟河諸大夫皆曰不可郤意茲曰可銳師伐河內傳必數日而後及絳絳不三月不能出河則我既濟水矣乃伐

河內齊侯皆斂諸大夫之軒唯郕意茲乘軒

鄭駟歆用鄧析竹刑

鄭駟歆嗣子大叔為政 九年駟歆殺鄧析而用其竹  
刑君子謂子然於是不忠苟有可以加於國家者棄其  
邪可也靜女之三章取彤管焉竿旄何以告之取其忠  
也故用其道不棄其人詩云蔽芾甘棠勿剪勿伐召伯  
所茇思其人猶愛其樹況用其道而不恤其人乎子然  
無以勸能矣

十年

齊人歸鄆謹龜陰之田

春及齊平夏公會齊侯于祝其實夾谷孔丘相犁彌言於齊侯曰孔丘知禮而無勇若使萊人以兵劫魯侯必得志焉齊侯從之孔丘以公退曰士兵之兩君合好而裔夷之俘以兵亂之非齊君所以命諸侯也裔不謀夏夷不亂華俘不干盟兵不偪好於神為不祥於德為愆義於人為失禮君必不然齊侯聞之遽辟之將盟齊人

加於載書曰齊師出竟而不以甲車三百乘從我者有如此盟孔丘使茲無還揖對曰而不反我汶陽之田吾以共命者亦如之齊侯將享公孔丘謂梁丘據曰齊魯之故吾子何不聞焉事既成矣而又享之是勤執事也且犧象不出門嘉樂不野合饗而既具是棄禮也若其不具用秕稗也用秕稗君辱棄禮名惡子盍圖之夫享所以昭德也不昭不如其已也乃不果享齊人來歸鄆謹龜陰之田



宋寵向魋

宋公子地嬖蘧富獵十一分其室而以其五與之公子地有白馬四公嬖向魋魋欲之公取而朱其尾鬣以與之地怒使其徒扶魋而奪之魋懼將走公閉門而泣之目盡腫母弟辰曰子分室以與獵也而獨卑魋亦有頗焉子為君禮不過出竟君必止子公子地出奔陳公弗止辰為之請弗聽辰曰是我廷吾兄也吾以國人出君誰與處冬母弟辰暨仲佗石彊出奔陳十一年春入

于蕭以叛秋樂大心從之大為宋患寵向魑故也

十二年

衛公孟彊伐曹

衛公孟彊伐曹克郊還滑羅殿未出不退於列其御曰  
殿而在列其為無勇乎羅曰與其素厲寧為無勇

魯墮三都

仲由為季氏宰將墮三都於是叔孫氏墮郈季氏將墮  
費公山不狃叔孫輒帥費人以襲魯公與三子入于季

氏之宮登武子之臺費人攻之弗克入及公側仲尼命  
申句勛須樂頎下伐之費人北國人追之敗諸姑蔑二  
子奔齊遂墮費將墮成公斂處父謂孟孫墮成齊人必  
至北門且成孟氏之保障也無成是無孟氏也子偽不  
知我將不墮冬公圍成弗克

十三年

衛逐公叔氏

初衛公叔文子朝而請享靈公退見史鮪而告之史鮪

曰子必禍矣子富而君貪罪其及子乎文子曰其若之  
何史鰌曰無害子臣可以免富而能臣必免於難上下  
同之戍也驕其亡乎富而不驕者鮮吾唯子之見驕而  
不亡者未之有也戍必與焉及文子卒衛侯始惡於公  
叔戍以其富也公叔戍又將去夫人之黨夫人愬之曰  
戍將為亂十四年春衛侯逐公叔戍與其黨故趙陽  
奔宋戍來奔

十四年

衛蒯聵爭國

衛侯為夫人南子召宋朝太子蒯聵獻孟于齊過宋野  
野人歌之曰既定爾婁豬盍歸吾艾粃太子羞之謂戲  
陽速曰從我而朝少君少君見我我顧乃殺之速曰諾  
乃朝夫人夫人見太子太子三顧速不進夫人見其色  
啼而走曰蒯聵將殺余公執其手以登臺太子奔宋盡  
逐其黨太子告人曰戲陽速禍余戲陽速曰太子則禍  
余太子無道使余殺其母余不許將戕於余若殺夫人

將以余說余是故許而弗為以紓余死諺曰民保於信  
吾以信義也 哀二年初衛侯遊于郊子南僕公曰余  
無子將立女不對他日又謂之對曰郕不足以辱社稷  
君其改圖君夫人在堂三揖在下君命祇辱夏靈公卒  
夫人曰命公子郕為太子君命也對曰郕異於他子且  
君沒於吾手若有之郕必聞之且亡人之子輒在乃立  
輒六月晉趙鞅納衛太子于戚使太子統八人衰絰偽  
自衛逆者告於門哭而入遂居之 三年齊國夏衛石

曼姑帥師圍戚 十二年公會吳于橐臯吳徵會于衛  
初衛殺吳行人且姚而懼謀於行人子羽子羽曰吳方  
無道無乃辱吾君不如止也子木曰吳方無道國無道  
必弃疾於人往也長木之斃無不標也國狗之瘕無不  
噬也而況大國乎秋衛侯會吳于鄆吳人藩衛侯之舍  
子服景伯謂子貢曰夫諸侯之會事既畢矣侯伯致禮  
地主歸餼以相辭也今吳不行禮於衛而藩其君舍以  
難之子盍見大宰乃請束錦以行語及衛故大宰詒曰

寡君願事衛君衛君之來也緩故將止之子貢曰衛君之來必謀於其衆其衆或欲或否是以緩來其欲來者子之黨也其不欲來者子之讎也若執衛君是墮黨而崇讎也且合諸侯而執衛君誰敢不懼墮黨崇讎而懼諸侯或者難以霸乎大宰嚭說乃舍衛侯衛侯歸效夷言子之尚幼曰君必不免其死於夷乎執焉而又說其言從之固矣十五年衛孔圉娶太子蒯聵之姊生悝孔氏之豎渾良夫長而美孔文子卒通於內太子在戚



孔姬使之焉太子與之言曰苟使我入獲國服冕乘軒  
三死無與與之盟為請於伯姬閏月良夫與太子入昏  
二人蒙衣而乘寺人羅御如孔氏孔伯姬杖戈而先太  
子與五人介與殲從之迫孔悝於廁強盟之遂劫以登  
臺欒寧將飲酒炙未熟聞亂使告季子召獲駕乘車行  
爵食炙奉衛侯輒來奔季子將入遇子羔將出曰門已  
閉矣季子曰吾姑至焉子羔曰弗及不踐其難季子曰  
食焉不辟其難子羔遂出子路入及門公孫敢門焉曰

無入為也季子曰是公孫也求利焉而逃其難由不然利其祿必救其患有使者出乃入曰太子焉用孔悝雖殺之必或繼之且曰太子無勇若燔臺半必舍孔叔太子聞之懼下石乞孟賁敵子路以戈擊之斷纓子路曰君子死冠不免結纓而死孔子聞衛亂曰柴也其來由也死矣孔悝立莊公莊公害故政欲盡去之先謂司徒棼成曰寡人離病於外久矣子請亦嘗之歸告褚師比欲與之伐公不果十六年春棼成褚師比出奔宋衛

侯使馮武子告於周曰蒯賁得罪於君父君母逋竄於  
晉晉以王室之故不棄兄弟寘諸河上天誘其衷獲嗣  
守封焉使下臣盱敢告執事王使單平公對曰盱以嘉  
命來告余一人往謂叔父余嘉乃成世復爾祿次敬之  
哉方天之休弗敬弗休悔其可追六月衛侯飲孔惺酒  
於平陽重酬之大夫皆有納焉醉而送之夜半而遣之  
載伯姬於平陽而行出奔宋衛侯占夢嬖人求酒於大  
叔僖子不得與卜人比而告公曰君有大臣在西南隅

弗去懼害乃逐大叔遺衛侯謂渾良夫曰吾繼先君而不得其器若之何良夫代執火者而言曰疾與亡君皆君之子也召之而擇材焉可也若不材器可得也豎告太子太子劫公而強盟之且請殺良夫公曰其盟免三死曰請三之後有罪殺之公曰諾哉 十七年衛侯為虎幄於籍圃成求令名者而與之始食焉太子請使良夫良夫乘衷甸兩牡紫衣狐裘至袒裘不釋劔而食大子使牽以退數之以三罪而殺之晉趙鞅使告於衛曰

君之在晉也志父為主請君若太子來以免志父衛侯  
辭以難太子又使栾之夏趙鞅圍衛齊國觀陳瓘救衛  
簡子曰我卜伐衛未卜與齊戰乃還秋衛侯夢於北宮  
見人登昆吾之觀被髮北面而譟曰登此昆吾之虛縣  
縣生之瓜余為渾良夫呌天無辜衛侯貞卜其繇曰如  
魚窺尾衡流而方蒲郎羊裔焉大國滅之將士闔門塞竇  
乃自後踰冬十月晉復伐衛入其郭將入城簡子曰止  
叔向有言曰怙亂滅國者無後衛人出莊公而與晉平

晉立襄公之孫般師而還十一月衛侯自鄆入般師出

初公登城以望見戎州戎邑問之以告公曰我姬姓也何

戎之有焉翦之公使匠久公欲逐石圃未及而難作辛

巳石圃因匠氏攻公公闔門而請弗許踰於北方而隊

折股戎州人攻之公入於戎州己氏初公自城上見己

氏之妻髮美使髡之以為呂姜髡既入焉而示之璧曰

活我吾與女璧己氏曰殺女璧其焉往遂殺之而取其

璧衛人復公孫般師而立之十二月齊人伐衛衛人請

平立公子起執般師以歸 十八年夏衛石圃逐其君  
起起奔齊衛侯輒自齊復歸逐石圃而復石魋與大叔  
遺 二十五年五月衛侯出奔宋衛侯為靈臺於藉圃  
與諸大夫飲酒焉褚師聲子韞而登席公怒辭曰臣有  
疾異於人若見之君將設之是以不敢公愈怒大夫辭  
之不可褚師出與司寇亥乘曰今日幸而後亡公之入  
也奪南氏邑而奪司寇亥政公使侍人納公文懿子之  
車於池初衛人翦夏丁氏以其帑賜彭封彌子彌子飲

公酒納夏戊之女嬖以為夫人其弟期為司徒夫人寵  
衰期得罪公使三匠久公使優狡盟拳彌而甚近信之  
故褚師比公孫彌牟公文要司寇亥司徒期因三匠與拳  
彌以作亂皆執利兵無者執斤譟以攻公鄆子士請禦  
之彌援其手曰子則勇矣將若君何不見先君乎且君  
嘗在外矣豈必不反當今不可衆怒難犯休而易間也  
乃出將適蒲彌曰晉無信不可將適鄆彌曰齊晉爭我  
不可將適泠彌曰魯不足與請適城鉏以鈎越越有君



乃適城鉏彌曰衛盜不可知也請速自我始乃載寶以歸公為支離之卒因祝史揮以侵衛衛人病之懿子知之見子之請逐之揮在朝使吏遣諸其室揮出信弗內五日乃館諸外里遂有寵使如越請師二十六年五月叔孫舒帥師會越臯如后庸宋樂茂納衛侯文子欲納之懿子曰君愎而虐少待之必毒於民乃睦於子矣師侵外州大獲出禦之大敗文子使王孫齊私於臯如曰子將大滅衛乎抑納君而已乎臯如曰寡君之命納

衛君而已文子致衆而問焉曰君以蠻夷伐國國幾亡矣請納之衆曰勿納曰彌牟亡而有益請自北門出衆曰勿出重賂越人申開守陴納公公不敢入師還立悼公南氏相之以城鉏與越人公曰期則為此令苟有怨於夫人者報之司徒期聘於越公奪之幣期告王王命取之期以衆取之公怒殺期之甥之為大子者遂卒於越衛出公自城鉏使以弓問子贛且曰吾其入乎子贛稽首受弓對曰臣不識也私於使者曰昔成公孫於陳

甯武子孫莊子為宛濮之盟而君入獻公孫于齊子  
鮮子展為夷儀之盟而君入今君再在孫矣內不聞獻  
之親外不聞成之卿則賜不識所由入也詩曰無競惟  
人四方其順之若得其人四方以為主而國於何有

十五年

邾隱公來朝

邾隱公來朝子貢觀焉邾子執玉高其容仰公受玉卑  
其容俯子貢曰以禮觀之二君者皆有死亡焉夫禮死

生存亡之體也將左右周旋進退俯仰於是乎取之朝  
祀喪戎於是乎觀之今正月相朝而皆不度心已亡矣  
嘉事不體何以能久高仰驕也卑俯替也驕近亂替近  
疾君為主其先亡乎五月壬申公薨仲尼曰賜不幸言  
而中是使賜多言者也

哀公

三年

桓僖災

夏五月司鐸

名官

火火踰公宮桓僖災南宮敬叔至命周

人出御書俟於宮曰庀女而不在死子服景伯至命宰  
人出禮書以待命命不共有常刑校人乘馬巾車脂轄  
百官官備府庫慎守官人肅給濟濡帷幕鬱攸從之蒙  
葺公屋自大廟始外內以悛助所不給有不用命則有  
常刑公父文伯至命校人駕乘車季桓子至御公立於  
象魏之外命藏象魏曰舊章不可亡也富父槐至曰無  
備而官辦者猶拾瀋也於是去表之稿道還公宮孔子

在陳聞火曰其桓僖乎

季孫有疾命正常以後事

秋季孫有疾命正常曰無死南孺子之子男也則以告而立之女也則肥也可南氏生男正常載以如朝告曰夫子有遺言命其圉臣曰南氏生男則以告於君與大夫而立之今生矣男也敢告遂奔衛康子請退公使共劉視之則或殺之矣乃討之召正常正常不反

五年

齊陽生弑荼

齊燕姬生子不成而死諸子鬻似之子荼嬖諸大夫恐其為大子也言於公曰君之齒長矣未有大子若之何公曰二三子閒於憂虞則有疾疢亦姑謀樂何憂於無君公疾使國惠子高昭子立荼寘羣公子於萊秋齊景公卒冬十月公子嘉公子駒公子黔奔衛公子鉏公子陽生來奔萊人歌之曰景公死乎不與埋三軍之事乎不與謀師乎師乎何黨之乎六年齊陳乞偽事高國

者每朝必駢乘焉所從必言諸大夫曰彼皆偃蹇將棄  
子之命皆曰高國得君必偪我盍去諸子蚤圖之圖之  
莫如盡滅之需事之下也又謂諸大夫曰二子者禍矣  
恃得君而欲謀二三子曰國之多難貴寵之由盡去之  
而後君定盍及其未作也先諸作而後悔亦無及也大  
夫從之夏六月陳乞鮑牧及諸大夫以甲入於公宮昭  
子聞之與惠子乘如公戰於莊敗國夏奔莒遂及高張  
晏圉弦施來奔八月陳僖子使召公子陽生逮夜至於



齊僖子使子士之母養之與饋者皆入冬十月丁卯立  
之將盟鮑子醉而往其臣差車鮑點曰此誰之命也陳  
子曰受命於鮑子遂誣鮑子曰子之命也鮑子曰女忘  
君之為孺子牛而折其齒乎而背之也悼公稽首曰吾  
子奉義而行者也若我可不必亡一大夫若我不可不  
必亡一公子義則進否則退敢不唯子是從廢興無以  
亂則所願也鮑子曰誰非君之子乃受盟使胡姬以安  
孺子如賴去鬻如公使朱毛告於陳子曰微子則不及

此然君異於器不可以二器二不匱君二多難敢布諸  
大夫僖子泣曰君舉不信羣臣乎以齊國之困困又有  
憂少君不可以訪是以求長君庶亦能容羣臣乎不然  
夫孺子何罪毛復命公悔之毛曰君大訪於陳子而圖  
其小可也使毛遷孺子於駘不至殺諸野幕之下 八  
年或譖胡姬於齊侯曰安孺子之黨也六月齊侯殺胡  
姬鮑牧謂羣公子曰使女有馬千乘乎公子慙之公謂  
鮑子或譖子子姑居於潞以察之若有之則分室以行

若無之則反子之所出門使以三分之一行半道使以二乘及潞廩之以入遂殺之

鄭駟秦富而侈

鄭駟秦富而侈嬖大夫也而常陳卿之車服於其庭鄭人惡而殺之子思曰詩曰不解于位民之攸墜不守其位而能久者鮮矣商頌曰不僭不濫不敢怠皇命以多福

六年

楚滅陳

吳伐陳楚子曰吾先君與陳有盟不可以不救乃救陳師于城父將救陳卜戰不吉卜退不吉王曰然則死也再敗楚師不如死棄盟逃讎亦不如死死一也其死讎乎命公子申為王不可則命公子結亦不可則命公子啟五辭而後許將戰王有疾卒於城父子閭退曰君王舍其子而讓羣臣敢忘君乎從君之命順也立君之子亦順也二順不可失也與子西子期謀潛師閉塗逆越

女之子章立之而後還是歲也有雲如衆赤鳥夾日以  
飛三日楚子使問諸周大史周大史曰其當王身乎若  
禳之可移於令尹司馬王曰除腹心之疾而寘諸股肱  
何益不穀不有大過天其天諸有罪受罰又焉移之遂  
弗禳初昭王有疾卜曰河為崇王弗祭大夫請祭諸郊  
王曰三代命祀祭不越望江漢睢漳楚之望也禍福之  
至不是過也不穀雖不德河非所獲罪也遂弗祭孔子  
曰楚昭王知大道矣其不失國也宜哉夏書曰惟彼陶

唐帥彼天常有此冀方今失其行亂其紀綱乃滅而亡  
又曰允出茲在茲由已率常可矣 九年夏楚人伐陳  
陳即吳故也 十年冬楚子期伐陳吳延州來季子救  
陳謂子期曰二君不務德而力爭諸侯民何罪焉我請  
退以為子名務德而安民乃還 十五年楚子西子期  
伐吳陳侯使公孫貞子弔焉及良而卒將以尸入吳子  
使大宰嚭勞且辭曰以水潦之不時無乃廩然墮大夫  
之尸以重寡君之憂寡君敢辭上介芋尹蓋對曰寡君

聞楚為不道荐伐吳國滅厥民人寡君使蓋備使弔君之下吏無祿使人逢天之感大命隕隊絕世於良廢日共積一日遷次今君命逆使人曰無以尸造於門是我寡君之命委于草莽也且臣聞之曰事死如事生禮也於是乎有朝聘而終以尸將事之禮又有朝聘而遭喪之禮若不以尸將命是遭喪而還也無乃不可乎以禮防民猶或踰之今大夫曰死而棄之是棄禮也其何以為諸侯主先民有言曰無穢虐士備使奉尸將命苟我

寡君之命達于君所雖隕於深淵則天命也非君與涉人之過也吳人內之十七年楚白公之亂陳人恃其聚而侵楚楚既寧將取陳麥楚子問帥于大師子穀與葉公諸梁子穀曰右領差車與左史老皆相令尹司馬以伐陳其可使也子高曰率賤民慢之懼不用命焉子穀曰觀丁父郤俘也武王以為軍率是以克州蓼服隨唐大啓羣蠻彭仲爽申俘也文王以為令尹實縣申息朝陳蔡封畛於汝唯其任也何賤之有子高曰天命不



諂令尹有憾於陳天若亡之其必令尹之子是與君盍  
舍焉臣懼右領與左史有二俘之賤而無其令德也王  
卜之武城尹吉使帥師取陳麥陳人御之敗遂圍陳秋  
七月滅陳

七年

魯伐邾吳齊伐魯

夏公會吳于鄆季康子欲伐邾乃饗大夫以謀之子服  
景伯曰小所以事大信也大所以保小仁也背大國不

信伐小國不仁民保於城城保於德失二德者危將焉  
保孟孫曰二三子以為何如惡賢而逆之對曰禹合諸  
侯于塗山執玉帛者萬國今其存者無數十焉唯大不  
字小小不事大也知必危何故不言魯德如邾而以衆  
加之可乎不樂而出秋伐邾及范門猶聞鐘聲大夫諫  
不聽茅成子請告於吳不許曰魯擊柝聞於邾吳二千  
里不三月不至何及於我且國內豈不足成子以茅叛  
師遂入邾處其公宮衆師晝掠以邾子益來獻于亳社

因諸負瑕邾茅夷鴻以束帛乘韋自請救於吳曰魯弱  
晉而遠吳馮恃其衆而背君之盟辟君之執事以陵我  
小國邾非敢自愛也懼君威之不立君威之不立小國  
之憂也若夏盟於鄆衍秋而背之成求而不違四方諸  
侯其何以事君且魯賦八百乘君之貳也邾賦六百乘  
君之私也以私奉貳唯君圖之吳子從之 八年吳為  
邾故將伐魯問於叔孫輒叔孫輒對曰魯有名而無情  
伐之必得志焉退而告公山不狃公山不狃曰非禮也

君子違不適讎國未臣而有伐之奔命焉死之可也所託也則隱且夫人之行也不以所惡廢鄉今子以小惡而欲覆宗國不亦難乎若使子率子必辭王將使我子張病之王問於子洩對曰魯雖無與立必有與斃諸侯將救之未可以得志焉晉與齊楚輔之是四讎也夫魯齊晉之脣脣亡齒寒君所知也不救何為三月吳伐我子洩率故道險從武城初武城人或有因於吳竟田焉拘鄆人之漚管者曰何故使吾水滋及吳師至拘者道

之以伐武城克之克東陽而進舍於五梧明日舍於蠶  
室公賓庚公甲叔子與戰于夷獲叔子與析朱鉏獻於  
王王曰此同車必使能國未可望也明日舍於庚宗遂  
次于泗上微虎欲宵攻王舍私屬徒七百人三踊於幕  
庭卒三百人有若與焉或謂季孫曰不足以害吳而多  
殺國士不如已也乃止之吳子聞之一夕三遷吳人行  
成乃盟齊悼公之來也季康子以其妹妻之即位而逆  
之季魴侯通焉女言其情弗敢與也齊侯怒使如吳請

師將以伐我乃歸邾子邾子又無道吳子使大宰子餘討之囚諸樓臺桷之以棘使諸大夫奉大子革以為政秋及齊平齊閭丘明來涖盟且逆季姬以歸九年春齊侯使公孟綽辭師於吳吳子曰昔歲寡人聞命今又革之不知所從將進受命於君秋吳城邾寒溝通江淮冬吳子使來儆師伐齊十年春邾隱公來奔齊甥也故遂奔齊公會吳子邾子邾子伐齊南鄙齊人弑悼公赴于師吳子三日哭於軍門之外徐承帥舟師將自海

入齊齊人敗之吳師乃還 十一年春齊國書高無丕  
帥師伐我及清孟孺子泄帥右師冉求帥左師及齊師  
戰于郊師入齊軍右師奔齊人從之孟之側後入以為  
殿抽矢策其馬曰馬不進也林不狃之伍曰走乎不狃  
曰誰不如曰然則止乎不狃曰惡賢徐步而死師獲甲  
首八十齊人不能師宵謀曰齊人遁公為與其嬖僮汪  
錡乘皆死皆殯孔子曰能執干戈以衛社稷可無殤也  
冉有用矛於齊師故能入其軍孔子曰義也夏為郊戰

故公會吳子伐齊中軍從王胥門巢將上軍王子姑曹  
將下軍展如將右軍齊國書將中軍高無平將上軍宗  
樓將下軍陳僖子謂其弟書爾死我必得志宗子陽與  
閭丘明相厲也桑掩胥御國子公孫夏曰二子必死將  
戰公孫夏命其徒歌虞殯陳子行命其徒具含玉公孫  
揮命其徒曰人尋約吳髮短東郭書使問弦多以琴曰  
吾不復見子矣陳書曰此行也吾聞鼓而已不聞金矣  
甲戌戰於艾陵大敗齊師獲國書公孫夏閭丘明陳書



東郭書革車八百乘甲首三千人以獻于公公使大史  
固歸國子之元寘之新篋製之以玄纁加組帶焉寘書  
于其上曰天若不識不衷何以使下國 十二年公會  
吳于橐臯吳子使大宰嚭請尋盟公不欲使子貢對曰  
盟所以周信也故心以制之玉帛以奉之言以結之明  
神以要之寡君以為苟有盟焉弗可改也已若猶可改  
日盟何益今吾子曰必尋盟若可尋也亦可寒也乃不  
尋盟吳徵會於衛衛侯會吳于鄆 十三年夏公會單

平公晉定公吳夫差於黃池秋七月辛丑盟吳晉爭先  
吳人曰於周室我為長晉人曰於姬姓我為伯趙鞅呼  
司馬寅曰日盱矣大事未成二臣之罪也建鼓整列二  
臣死之長幼必可知也對曰請姑視之反曰肉食者無  
墨今吳王有墨國勝乎大子死乎且夷德輕不忍久請  
少待之乃先晉人吳人將以公見晉侯子服景伯對使  
者曰王合諸侯則伯帥侯牧以見于王伯合諸侯則侯  
帥子男以見於伯自王以下朝聘玉帛不同故敝邑之

職貢於吳有豐於晉無不及焉今諸侯會而君將以寡  
君見晉君則晉成為伯矣敝邑將改職貢魯賦於吳八  
百乘若為子男則將半邾以屬於吳而如邾以事晉且  
執事以伯召諸侯而以侯終之何利之有焉吳人乃止  
既而悔之將囚景伯景伯曰何也立後於魯矣遲速唯  
命遂囚以還及戶牖謂大宰曰魯將以十月上辛有事  
於上帝先王季辛而畢何世有職焉若不會祝宗將曰  
吳實然且謂魯不共而執其賤者何損焉大宰諾言於

王乃歸景伯吳申叔儀乞糧於公孫有山氏曰佩玉褱兮余無所繫之旨酒一盛兮余與褐之父晚之對曰梁則無矣麤則有之若登首山以呼曰庚癸乎則諾

庚酉方主

穀癸北方主水

王欲伐宋大宰嚭曰可勝也而弗能居也乃歸

### 宋伐曹

宋人圍曹初曹人或夢衆君子立於社宮而謀亡曹曹叔振鐸請待公孫彊許之旦而求之曹無之戒其子曰我死爾聞公孫彊為政必去之及曹伯陽即位好田弋

曹鄙人公孫彊好弋獲白鴈獻之且言田弋之說說之  
因訪政事大說之有寵使為司城以聽政夢者之子乃  
行彊言霸說於曹伯曹伯從之乃背晉而奸宋宋人伐  
之晉人不救築五邑於其郊七年八年春宋公將還曹  
人詬之公怒命反之遂滅曹執曹伯及司城彊以歸殺  
之

九年

鄭圍宋取邑大敗晉卜救鄭

鄭武子賁之嬖許瑕求邑無以與之請外取許之故圍  
宋雍邱宋皇瑗圍鄭師每日遷舍壘合鄭師哭子姚救  
之大敗二月宋取鄭師于雍丘使有能者無死以郊張  
與鄭羅歸晉趙鞅卜救鄭遇水適火占諸史趙史墨史  
龜史龜曰是謂沈陽可以興兵利以伐姜不利子商史  
墨曰盈水名也姓趙子水位也姓宋名位敵不可干也炎帝  
為火師姜姓其後也水勝火伐姜則可史趙曰是謂如  
川之滿不可游也鄭方有罪不可救也救鄭則不吉不

知其他陽虎以周易筮之遇泰



乾上之需



乾下

坎曰宋方吉不可與也微子啓帝乙之元子也宋鄭甥

舅也

宋商後今得帝乙之封故知宋吉帝乙紂父

祉祿也若帝乙之元子歸

妹而有吉祿我安得吉焉乃止 十年夏趙鞅帥師伐

齊大夫請卜之趙孟曰吾卜於此起兵事不再令卜不

襲吉行也於是乎取犂及轅毀高唐之郭侵及賴而還

十一年

陳轅頗出奔鄭

夏陳轅頗出奔鄭初轅頗為司徒賦封田以嫁公女有餘以為已大器國人逐之故出道渴其族轅咺進稻醴梁糗暇脯焉喜曰何其給也對曰器成而具曰何不吾諫對曰懼先行

衛大叔疾出奔宋

衛大叔疾出奔宋初疾娶於宋子朝其娣嬖子朝出孔文子使疾出其妻而妻之疾使侍人誘其初妻之娣寘於犁而為之一宮如二妻文子怒欲攻之仲尼止之遂



奪其妻或淫于外州外州人奪之軒以獻耻是二者故  
出初文子之將攻大叔也訪於仲尼仲尼曰胡簋之事  
則嘗學之矣甲兵之事未之聞也退命駕而行曰鳥則  
擇木木豈能擇鳥文子遽止之曰圉豈敢度其私訪衛  
國之難也將止魯人以幣召之乃歸

季孫用田賦

季孫欲以田賦使冉有訪諸仲尼仲尼曰丘不識也三  
發卒曰子為國老待子而行若之何子之不言也仲尼

不對而私於冉有曰君子之行也度於禮施取其厚事  
舉其中斂從其薄如是則以丘亦足矣若不度於禮而  
貪冒無厭則雖以田賦將又不足且子季孫若欲行而  
法則周公之典在若欲苟而行又何訪焉弗聽 十二  
年春王正月用田賦

十二年

昭夫人孟子卒

夏昭夫人孟子卒孔子與弔適季氏季氏不綽放經而

拜

十四年

西狩獲麟

春西狩于大野叔孫氏之車子鉏商獲麟以為不祥以  
賜虞人仲尼觀之曰麟也然後取之

小邾射以句繹來奔

小邾射以句繹來奔曰使季路要我吾無盟矣使子路  
子路辭季康子使冉有謂之曰千乘之國不信其盟而

信子之言子何辱焉對曰魯有事于小邾不敢問故死其城下可也彼不臣而濟其言是義之也由弗能

陳常弑簡公

齊簡公之在魯也闕止有寵焉及即位使為政陳成子憚之驟顧諸朝諸御鞅言於公曰陳闕不可並也君其擇焉弗聽子我夕陳逆殺人逢之遂執以入陳氏方睦使疾而遺之潘沐備酒肉焉饗守囚者醉而殺之而逃子我盟諸陳於陳宗初陳豹欲為子我臣使公孫言已

已有喪而止既而言之曰有陳豹者長而上僂望視欲  
為子臣吾憚其為人也故緩以告子我曰何害是其在  
我也使為臣他日與之言政說遂有寵謂之曰我盡逐  
陳氏而立女若何對曰我遠於陳氏矣且其違者不過  
數人何盡逐焉遂告陳氏子行曰彼得君弗先必禍子  
子行舍於公宮夏五月成子四乘如公子我在幄出逆  
之遂入閉門侍人禦之子行殺侍人子我歸屬徒攻闥  
與大門皆不勝乃出豐丘人執之殺諸郭闕成子將殺

大陸子方陳逆請而免之出雍門陳豹與之車弗受曰  
逆為余請豹與余車余有私焉事子我而有私於其讎  
何以見魯衛之士東郭賈奔衛庚辰陳恒執公于舒州  
公曰吾早從鞅之言不及此甲午陳恒弑其君壬於舒  
州孔丘三日齊而請伐齊三公曰魯為齊弱久矣子之  
伐之將若之何對曰陳恒弑其君民之不與者半以魯  
之衆加齊之半可克也公日子告季孫孔子辭退而告  
人曰吾以從大夫之後也故不敢不言

宋桓魋之亂

宋桓魋之寵害於公公使夫人驟請享焉而將討之未及魋先謀公請以鞶易薄公曰薄宗邑也乃益鞶七邑而請享公焉以日中為期家備盡往公知之告皇野子仲曰有臣不順神之所惡也而況人乎敢不承命不得左師不可請以君命召之左師每食擊鍾聞鍾聲公曰夫子將食既食又奏公曰可矣以乘車往曰迹人來告曰逢澤有介麋焉公曰得左師吾與之田若何與之乘

至公告之故拜不能起司馬曰君與之言公曰所難子者上有天下有先君對曰隍之不共宋之禍也敢不唯命是聽請瑞馬以命其徒攻桓氏子頎騁而告桓司馬司馬欲入子車止之曰不能事君而又伐國祇取死焉向魍入於曹以叛六月使左師巢伐之向魍奔衛向巢來奔宋公使止之曰寡人與子有言矣不可以絕向氏之祀辭曰臣之罪大若以先臣之故而使有後君之惠也若臣則不可以入矣司馬牛致其邑與珪焉而適齊



向魋奔齊陳成子使為次卿牛又致其邑馬而適吳吳人惡之而反趙簡子召之陳成子亦召之卒于魯郭門之外葬諸丘輿

### 成叛

初孟孺子洩將圍馬於成成宰公孫宿不受曰孟氏為成之病不圍馬焉秋懿子卒成人奔喪弗內袒免哭於衢聽共弗許懼不歸十五年成叛于齊武伯伐成不克遂城輸秋齊陳瓘如楚過衛仲由見之曰天或者以

陳氏為斧斤既斲喪公室而他人有之不可知也其使  
終饗之亦不可知也若善魯以待時不亦可乎子玉曰  
然吾受命矣子使告我弟冬及齊平子服景伯如齊子  
贛為介見公孫成曰人皆臣人而有背人之心況齊人  
雖為子役其有不貳乎子周公之孫也多饗大利猶思  
不義利不可得而喪宗國將焉用之成曰善哉吾不早  
聞命陳成子館客曰寡君使恒告曰寡人願事君如事  
衛君景伯揖子贛而進之對曰寡君之願也昔晉人伐

衛齊為衛故伐晉冠氏喪車五百因與衛地自濟以西  
襍媚杏以南書社五百吳人加敝邑以亂齊因其病取  
謹與闡寡君是以寒心若得視衛君之事君也則固所  
願也成子病之乃歸成公孫宿以其兵甲入於羸 十  
七年公會齊侯盟于蒙孟武伯相齊侯稽首公拜齊人  
怒武伯曰非天子寡君無所稽首 二十年春齊人來  
徵會夏會于廩丘為鄭故謀伐晉鄭人辭諸侯秋師還  
二十一年秋公及齊侯邾子盟于顧齊人責稽首因

歌之曰魯人之皐數年不覺使我高蹈唯其儒書以為  
二國憂是行也公先至於陽穀齊閭丘息曰君辱舉玉  
趾以在寡君之軍羣臣將傳遽以告寡君比其復也君  
無乃勤為僕人之未次請除館於舟道辭曰敢勤僕人

十六年

孔丘卒

夏四月孔丘卒公誄之曰旻天不弔不憇遺一老俾屏  
余一人以在位訃訃余在疚嗚呼哀哉尼父無自律子

贛曰君其不沒於魯乎夫子之言曰禮失則昏名失則  
愆失志為昏失所為愆生不能用死而誅之非禮也稱  
一人非名也君兩失之

楚白公之亂

楚大子建之遇讒也自城父奔宋又辟華氏之亂於鄭  
鄭人甚善之又適晉與晉人謀襲鄭乃求復焉鄭人復  
之如初晉人使諒於子木請行而期焉子木暴虐於其  
私邑邑人訴之鄭人得晉諒焉遂殺子木其子曰勝在

吳子西欲召之葉公曰吾聞勝也詐而亂無乃害乎子  
西曰吾聞勝也信而勇不為不利舍諸邊竟使衛藩焉  
葉公曰周仁之謂信率義之謂勇吾聞勝也好復言而  
求死士殆有私乎復言非信也期死非勇也子必悔之  
弗從召之使處吳竟為白公請伐鄭子西曰楚未節也  
不然吾不忘也他日又請許之未起師晉人伐鄭楚救  
之勝怒曰鄭人在此讎不遠矣勝自厲劒子期之子平  
見之曰王孫何自厲也曰勝以直聞不告女庸為直乎

將以殺爾父平以告子西子西曰勝如卵余翼而長之  
楚國第我死令尹司馬非勝而誰勝聞之曰令尹之狂  
也得死乃非我子西不悛勝謂石乞曰王與二卿士皆  
五百人當之則可矣乞曰不可得也曰市南有熊宜僚  
者若得之可以當五百人矣乃從白公而見之與之言  
說告之故辭承之以劍不動勝曰不為利諂不為威惕  
不泄人言以求媚者去之吳人伐慎白公敗之請以戰  
備獻許之遂作亂秋七月殺子西子期于朝而劫惠王

子西掩面而死子期曰昔者吾以力事君不可以弗終  
挾豫章以殺人而後死石乞曰焚庫弑王不然不濟白  
公曰不可弑王不祥焚庫無聚將何以守乞曰有楚國  
而治其民以敬事神可以得祥且有聚矣何患弗從葉  
公在蔡方城之外皆曰可以入矣子高曰吾聞之以險  
徼倖者其求無饜偏重必離聞其殺齊管修也而後入  
白公欲以子閭為王子閭不可遂劫以兵子閭曰王孫  
若安靖楚國匡正王室而後庇焉啓之願也敢不聽從



若欲專利以傾王室不顧楚國有死不能遂殺之而以  
王如高府石乞尹門圉公陽穴宮負王以如昭夫人之  
宮葉公亦至及北門或遇之曰君胡不胄國人望君如  
望慈父母焉盜賊之矢若傷君是絕民望也若之何不  
胄乃胄而進又遇一人曰君胡胄國人望君如望歲焉  
日月以幾若見君面是得艾也民知不死其亦夫有奮  
心猶將旌君以徇於國而又掩面以絕民望不亦甚乎  
乃免胄而進遇箴尹固帥其屬將與白公子高曰微二

子者楚不國矣棄德從賊其可保乎乃從葉公使與國  
人以攻白公白公奔山而縊其徒微之生拘石乞而問  
焉對曰余知其死所而長者使余勿言曰不言將烹乞  
曰此事克則為卿不克則烹固其所也何害乃烹石乞  
沈諸梁兼二事國寧乃使寧為令尹使寬為司馬而老  
於葉

十八年

楚公孫寧敗巴師

巴人伐楚圍鄢初右司馬子國之卜也觀瞻曰如志及巴師至將卜帥王曰寧如志何卜焉使帥師而行請承王曰寢尹工尹勤先君者也三月楚公孫寧吳由于遠固敗巴師于鄢故封子國于析君子曰惠王知志夏書曰官占唯能蔽志昆命于元龜其是之謂乎志曰聖人不煩卜筮惠王其有焉

二十一年

越人始來

夏五月越人始來 二十三年秋八月叔青如越始使越也越諸鞅來聘報叔青也

二十三年

宋景曹卒

宋景曹卒

元公夫人

季康子使冉有弔且送葬曰敝邑有社

稷之事使肥與有職競焉是以不得助執紼使求從與  
人曰以肥之得備彌甥也有不腆先人之產馬使求薦  
諸夫人之宰其可稱旌繁乎

# 晉伐齊

夏晉荀瑶伐齊高無丕帥師御之將戰長武子請卜知伯曰君告於天子而卜之以守龜於宗祧吉矣吾又何卜焉且齊人取我英丘君命瑶非敢耀武也治英丘也以辭伐罪足矣何必卜壬辰戰于犁丘齊師敗績知伯親禽顏庚二十四年夏晉侯將伐齊使來乞師曰昔臧文仲以楚師伐齊取穀宣叔以晉師伐齊取汶陽寡君欲徼福於周公願乞靈於臧氏臧石帥師會之取廩

丘軍吏令繕將進萊章曰君卑政暴往歲克敵今又勝都天奉多矣又焉能進是夔言也役將班矣晉師乃還餽臧石牛曰以寡君之在行牢禮不度敢展謝之

二十四年

哀公如越

公子荆之母嬖將以為夫人使宗人釁夏獻其禮對曰無之公怒曰女為宗司立夫人國之大禮也何故無之對曰周公及武公娶於薛孝惠娶於高自桓以下娶於

齊此禮也則有若以妾為夫人則固無其禮也公卒立之而以荊為太子國人始惡之閏月公如越得大子適郢將妻公而多與之地季孫懼使因大宰嚭而納賂焉乃止 二十五年六月公至自越季康子孟武伯逆於五梧郭重僕見二子曰惡言多矣君請盡之公宴於五梧武伯為祝惡郭重曰何肥也公曰是食言多矣能無肥乎飲酒不樂公與大夫始有惡 二十七年公患三桓之侈也欲以諸侯去之三桓亦患公之妄也故君臣

多閒公游於陵阪遇孟武伯於孟氏之衢曰請有問於  
子余及死乎對曰臣無由知之三問卒辭不對公欲以  
越伐魯而去三桓秋八月公如公孫有陘氏因孫于邾  
乃遂如越國人施公孫有山氏

二十六年

宋立昭公

宋景公無子取公孫周之子得與啓畜諸公宮未有立  
焉於是皇緩為右師皇非我為大司馬皇懷為司徒靈



不緩為左師樂伐為司城樂朱鉏為大司寇六卿三族  
降聽政因大尹以達大尹常不告而以其欲稱君命以  
令國人惡之司城欲去大尹左師曰縱之使盈其罪重  
而無基能無敝乎冬十月公游於空澤卒於連中大尹  
興空澤之士千甲奉公自空桐入如沃宮使召六子至  
以甲劫之曰君有疾病請二三子盟乃盟于少寢之庭  
曰無為公室不利大尹立啓奉喪殯於大宮司城伐使  
宣言於國曰大尹惑蠱其君而專其利今君無疾而死

死又匿之是無他矣大尹之罪也得夢啓北首而寢於  
廬門之外已為鳥而集於其上味加於南門尾加於桐  
門曰余夢美必立大尹謀曰我不在盟無乃逐我復盟  
之乎使祝為載書左師使徇於國曰大尹惑蠱其君以  
陵虐公室與我者救君者也衆曰與之大尹徇曰戴氏  
皇氏將不利公室與我者無憂不富衆曰無別大尹奉  
啓以奔楚乃立得司城為上卿盟曰三族共政無相害  
也

二十七年

越子盟于平陽

越子使后庸來聘且言邾田封于駘上二月盟于平陽  
三子皆從康子病之言及子贛曰若在此吾不及此夫  
武伯曰然何不召曰固將召之文子曰他日請念

晉荀瑶伐鄭

晉荀瑶帥師伐鄭次于桐丘鄭駟弘請救于齊齊師將  
興陳成子屬孤子三日朝設乘車兩馬繫五邑焉召顏

涿聚之子晉曰隰之役而父死焉以國之多難未女恤也今君命女以是邑也服車而朝毋廢前勞乃救鄭及留舒違穀七里穀人不知及濮雨不涉子思曰大國在敝邑之宇下是以告急今師不行恐無及也成子衣製杖戈立於阪上馬不出者助之鞭之知伯聞之乃還使謂成子曰大夫陳子陳之自出陳之不祀鄭之罪也故寡君使瑤察陳衷焉謂大夫其恤陳乎若利本之顛瑤何有焉成子怒曰多陵人者皆不在知伯其能久乎悼

之四年晉荀瑶帥師圍鄭未至鄭駟弘曰知伯懷而好勝早下之則可行也乃先保南里以待之知伯入南里門于桔枳之門鄭人俘鄩魁壘賂之以知政閉其口而死知伯謂趙孟入之對曰主在此知伯曰惡而無勇何以爲子對曰以能忍恥庶無害趙宗乎知伯不悛趙襄子由是甚知伯遂喪之知伯貪而懷故韓魏反而喪之

春秋左氏傳事類始末卷五

欽定四庫全書

春秋左氏傳事類始末附錄

災異

日食三十有六

書既三書朔書日二十六書  
日不書朔七書朔不書日一

不書朔  
與日二

隱三年春王二月己巳日有食之

桓三年秋七月壬辰朔日有食之既

十七年冬十月朔日有食之

莊十八年春王三月日有食之

二十五年六月辛未朔日有食之

二十六年冬十有二月癸亥朔日有食之

三十年九月庚午朔日有食之

僖五年九月戊申朔日有食之

十二年三月庚午日有食之

十五年夏五月日有食之

文元年二月癸亥日有食之



十五年六月辛丑朔日有食之

宣八年秋七月甲子日有食之既

十年夏四月丙辰日有食之

十七年六月癸卯日有食之

成十六年六月丙寅朔日有食之

十七年十有二月丁巳朔日有食之

襄十四年二月乙未朔日有食之

十五年秋八月丁巳日有食之

二十年冬十月丙辰朔日有食之

二十一年九月庚戌朔日有食之

冬十月庚辰朔日有食之

二十三年二月癸酉朔日有食之

二十四年秋七月甲子朔日有食之既

八月癸巳朔日有食之

二十七年冬十二月乙亥朔日有食之

昭七年夏四月甲辰朔日有食之

十五年六月丁巳朔日有食之

十七年夏六月甲戌朔日有食之

二十一年秋七月壬午朔日有食之

二十二年十有二月癸酉朔日有食之

二十四年夏五月乙未朔日有食之

三十一年十有二月辛亥朔日有食之

定五年三月辛亥朔日有食之

十二年十有一月丙寅朔日有食之

十五年八月庚辰朔日有食之

地震五

文九年九月癸酉地震

襄十六年五月甲子地震

昭十九年五月己卯地震

二十三年八月乙未地震

哀三年夏四月甲午地震

星隕一

莊七年夏四月辛卯夜恒星不見夜中星隕如雨

星孛三

文十四年星孛入于北斗

昭十七年星孛于大辰

哀十三年星孛于東方

雨雹三

僖二十有九年秋大雨雹

昭三年冬大雨雹

四年春正月大雨雹

雨雪三

隱九年三月庚辰大雨雪

桓八年冬十月雨雪

僖十年冬大雨雪

大雨震電一

隱九年三月癸酉大雨震電

震一

僖十五年九月己卯晦震夷伯之廟

隕霜不殺草一

僖三十三年十二月隕霜不殺草李梅實

隕霜殺菽一

定元年十月隕霜殺菽

無冰三

桓十四年春無冰

成元年二月無冰

襄二十八年春無冰

木冰

成十六年春王正月雨木冰

火災十二

火一災十一

桓十四年御廩災

莊二十年齊大災

僖二十年西宮災

宣十六年成周宣榭火



成三年新宮災

襄九年宋災

三十年宋災

昭九年陳災

十八年宋衛陳鄭災

定二年雉門及兩觀災

哀三年桓宮僖宮災

四年亳社災

屋壞一

文十三年大室屋壞

山崩二

僖十四年沙鹿崩

成五年梁山崩

有年二

桓三年冬有年

宣十六年冬大有年

大水九

桓元年秋大水

十三年夏大水

莊七年秋大水

十一年秋宋大水

二十四年秋八月大水

二十五年秋大水

宣十年秋大水

成五年秋大水

襄二十四年秋七月大水

不雨七

莊三十一年冬不雨

僖二年冬十月不雨

三年春正月不雨 夏四月不雨

文二年自十二月不雨至于秋七月

十年自正月不雨至於秋七月

十三年自正月不雨至於秋七月

大旱二

僖二十一年夏大旱

宣七年秋大旱

饑三

宣十年冬饑

十五年冬饑

襄二十四年冬大饑

蝨十

桓五年秋蝨

僖十五年秋八月蝨

文八年冬十月蝨

宣六年秋八月蝨

十三年秋蝨

十五年秋蝨

襄七年八月蝨

哀十二年十二月蝻

十三年九月蝻

十有二月蝻

雨蝻一

文三年秋雨蝻于宋

蝻一

宣十五年冬蝻生

螟三

隱五年九月螟

八年九月螟

莊六年秋螟

蜚一

莊二十九年秋有蜚

無麥苗一

莊七年秋無麥苗

無麥禾一



莊二十八年冬大無麥禾

或一

短狐也舍  
沙射人

莊十八年秋有或

麋一

莊十七年冬多麋

鸛鵒來巢一

昭二十五年夏有鸛鵒來巢

隕石退鷁一

僖十六年春正月戊申朔隕石于宋五是月六鷁退飛  
過宋都

弒君二十六

稱臣以弒十七稱人以弒三稱國以弒四

隱四年衛州吁弒其君完

十一年公薨

左羽父使賊弒公于寯氏

桓二年宋督弒其君與夷

莊八年齊無知弒其君諸兒

十二年宋萬弒其君捷

閔二年公薨

左共仲使卜弒賊公于武闕

僖十年晉里克弑其君卓

文元年楚商臣弑其君頤

十四年齊商人弑其君舍

十六年宋人弑其君杵臼

十八年齊人弑其君商人

冬莒弑其君庶其

宣二年晉趙盾弑其君夷臯

四年鄭歸生弑其君夷

十年陳夏徵舒弑其君平國

成十八年晉弑其君州蒲

襄二十五年齊崔杼弑其君光

二十六年衛甯喜弑其君剽

二十九年闔弑吳子餘祭

三十年蔡般弑其君固

三十一年莒人弑其君密州

昭十三年楚公子比弑其君虔

十九年許止弑其君買

二十七年吳弑其君僚

定十三年薛弑其君比

哀六年齊陳乞弑其君荼

左氏記鄭子駟弑僖公楚公子圍弑郟敖不見

於經

亡國三十二

自亡一  
吳滅二

齊滅五  
楚滅十五

諸侯同滅二  
魯衛狄莒蔡

鄭各一  
晉滅三

莊十年齊滅譚

十三年齊滅遂

僖五年楚滅弦

十年狄滅溫

十二年楚滅黃

十七年滅項

十九年梁亡

二十五年衛滅邢

二十六年楚滅夔

文四年楚滅江

五年楚滅六

十六年楚人秦人巴人滅庸

宣八年楚滅舒蓼

十二年楚滅蕭

十五年晉滅潞

十六年晉滅赤狄甲氏留吁

成十七年楚滅舒庸

襄六年莒滅鄆 十二月齊滅萊

十年諸侯滅偃陽

二十五年楚滅舒鳩

昭四年楚滅賴

八年楚滅陳

十三年封

十一年楚滅蔡

十三年封

十三年吳滅州來



十七年晉滅陸渾戎

二十四年吳滅巢

三十年吳滅徐

定四年蔡滅沈

六年鄭滅許

哀元年許男  
成復見經

十四年楚滅頓

十五年楚滅胡

左氏記滅而經不書及書入書取者凡十六國

莊十四年楚滅息十六年楚滅鄧閔元年晉滅

耿滅霍滅魏二年狄滅衛書入僖五年晉滅虢滅

虞書執虞公三十三年秦滅滑書入文五年楚滅蓼宣

九年取根牟成六年取鄭襄十三年取邾昭十

二年晉滅肥定五年楚滅唐哀八年宋滅曹書入

力役

宮室

莊二十九年春新延廡

僖二十年春新作南門

成六年二月立武宮

定元年九月立煬宮

二年冬十月新作雉門及兩觀

城築

城一十八外城三  
內城二十五築六

隱七年夏城中丘

九年夏城郎

桓五年夏城祝丘

十六年冬城向

莊二十八年冬築鄆

二十九年冬十二月城諸及防

三十一年春築臺于郎

夏四月築臺于薛

秋築臺于秦

三十二年春城小穀

僖元年夏六月齊宋曹城邢

二年正月城楚丘

十四年春諸侯城緣陵

文七年三月城郛

十二年十二月城諸及鄆

宣八年十月城平陽

成四年冬城鄆

九年十一月城中城

十八年秋八月築鹿囿

襄二年冬諸侯城虎牢

七年夏四月城費

十三年冬城防

十五年夏城成鄂

十九年冬城西鄂 城武城

昭九年冬築郎囿

三十二年冬諸侯城成周

定六年冬城中城

十四年秋城莒父及霄

十五年冬城漆

哀三年夏五月城啓陽

四年夏城西郭

五年春城毗

六年春城邾瑕

左氏記隱元年夏城郎冬新作南門不書於

經

時政

爰田

分公田之稅應入公者爰於所賞之衆

僖十五年秦晉戰於韓秦獲晉侯穆公許晉平晉侯使卻乞告瑕呂飴甥子金教之言曰朝國人而以君命賞晉於是乎作爰田

州兵

五黨為州使州長各繕兵

同上呂甥曰君亡之不恤而羣臣是憂惠之至也將若君何衆曰何為而可對曰征繕以輔孺子諸侯聞之喪



君有君羣臣輯睦甲兵益多好我者勸惡我者懼庶有益乎衆說晉於是乎作州兵

稅畝

公田之法十取其一今又履其餘畝復十收其一故哀公曰二吾猶不足遂以為常故曰

初

宣十五年初稅畝非禮也穀出不過籍以豐財也

丘甲

周禮九夫為井四井為邑四邑為丘丘十六井出長較一乘戎馬一匹牛三頭四丘為甸甸六十四人步卒七十二人此甸賦也魯使丘出之

成元年為齊難故作丘甲

丘賦

丘嘗出馬一尺牛三頭今子產別賦其田如魯田賦

昭四年秋鄭子產作丘賦

刑書

鑄刑書於鼎以爲國常法

昭六年三月鄭人鑄刑書

二十九年冬晉趙鞅荀寅帥師城汝濱遂賦晉國一鼓鐵以鑄刑鼎著范宣子所爲刑書焉

竹刑

析改鄭刑書私造憲法書之竹簡故名竹刑

定九年鄭駟歆殺鄧析而用其竹刑

田賦

田賦之法曰其田財通出馬一疋牛三頭今欲別其田與財各為一賦故言田賦

哀十二年春王正月用田賦

陳名

魚麗

桓五年王以諸侯伐鄭鄭伯禦之曼伯為右拒

拒方陳

祭

足為左拒原繁高渠彌以中軍奉公為魚麗之陳先偏

後伍伍承彌縫

車二十五乘為偏以車居前以伍次之承偏之隙而彌縫其闕漏也此魚麗陳

法

荊尸

莊四年楚武王荊尸授師子焉以伐隨

武王更為楚陳兵之法子戰也

楚始於此參用戰為陳

左孟右孟

孟田獵陳名

文十年楚子將伐宋宋公逆之勞且聽命遂道以田孟諸宋公為右孟鄭伯為左孟

左拒右拒

宣十二年郟之役楚工尹齊將右拒卒以逐晉下軍潘

黨率游闕

游車補闕者

四十乘從唐侯以為左拒以從晉上

軍

崇卒

昭元年晉中行穆子敗無終及羣狄于大原崇卒也將戰魏舒曰彼徒我車所遇又阨以什共車必克困諸阨又克請皆卒自我始乃毀車以為行五乘為三伍為五陳以相離兩於前伍於後專為右角參為左角偏為前拒

驚鶴

昭二十一年諸侯救宋與華氏戰于赭丘鄭翩願為鶴  
其御願為驚

左右句卒

哀十七年越子伐吳夾水而陳越子為左右句卒

鉤伍相著

別為左  
右屯

使夜或左或右鼓譟而進吳分師御之越子以

三軍潛涉當吳中軍而鼓之大敗之

支離之卒

哀二十五年衛出公為支離之卒以侵衛

器物

蜚弧

旗

臯比

虎皮

金僕姑

矢

經皇

冢前

鞶鑑

帶以鑑為飾

丁寧

鉦

笠轂

兵車無蓋尊者則人執笠依轂而立以禦寒暑

軌車

兵車

室皇

寢門闕

佐車

副車

紀甌

玉甌

賦輿

兵車

巢車

車上有櫓

附注

戎服

頌琴

送終雅琴

畚揭

簣籠土舉

旌夏

大旌

廣車

兵車

彝器

鐘鼎

宗器

鐘磬

武軍

營壁

大蔡

龜

寢戈

親近兵仗

長轂

兵車

大屈

弓

靈姑鉞

旗

復陶

羽衣

餘皇

舟

無射

鐘

楸枰

棺中  
琴牀

僂句

龜

啓服

馬

龍輔

玉

肅爽

馬

繁弱

弓

少帛

雜帛

大呂

鐘

闕鞏

甲

沽洗

鐘

昭兆

龜

羽毛

旌

蔥靈

輜車

屬辟

棺重  
數

大器

鼎鐘

屬鏤

劍

衷甸

一轅  
卿車



列國興廢

周自后稷凡二十七世至幽王四十九年己未入春秋  
至敬王三十九年庚申歷十三王春秋終自後傳九王  
又分為東西凡二百二十六年秦併之

魯自周公凡十五世至隱公元年入春秋至哀公十四  
年歷十二君春秋終自後傳八君凡二百年楚滅之

齊自太公凡十三世至僖公九年入春秋至簡公四年  
歷十四君春秋終自後傳三君凡九十五年為田氏田

氏自傳七世凡百七十一年而秦滅之比諸國最後亡

晉自叔虞

成王封之

凡十三世至鄂侯二年入春秋至定公

三十一年歷十八君

四世後曲沃武公入併晉

春秋終自後傳六君

凡一百五年魏韓趙滅之三國韓先亡趙次之魏又次

之

秦自秦仲

宣王使為大夫始大其孫襄公始為諸侯

凡四世至文公四十四

年入春秋至悼公十年歷十五君春秋終自後傳十五

君凡二百六十六年而始皇併天下

二十六年併天下自秦仲至此六百

二十  
五年

楚自熊繹

成王時封

凡十八世至武王十九年入春秋至惠

王八年歷十三君春秋終自後傳十二君凡二百五十

八年秦滅之

宋自微子

武王封之朝鮮  
成王命代商後

凡十四世至穆公七年入春

秋至景公三十六年歷十三君春秋終自後傳六君凡

百九十七年齊魏楚滅之

衛自康叔

成王封之

凡十二世至桓公十三年入春秋至出

公十二年歷十五君春秋終自後傳十四君降稱侯又  
降稱君凡二百六十三年秦併之雖後齊亡而微甚矣  
陳自胡公滿武王封之凡十二世至桓公二十三年入春秋  
至緡公二十一年歷十二君春秋終自後三年而楚滅  
之

蔡自蔡叔

武王時封

凡十一世至宣侯二十八年入春秋至

成侯十年歷十二君春秋終自後傳三君凡三十四年

楚滅之

曹自振鐸

武王時封

凡十一世至桓公三十五年入春秋至

伯陽十五年歷十五君先春秋六年宋滅之

鄭自桓公友

宣王時封

凡三世至莊公二十二年入春秋至

聲公二十年歷十六君春秋終自後傳五君凡一百四

年韓滅之

燕自召公

與周呂皆武王所封

凡十四世至穆侯七年入春秋至

獻公十二年歷十七君春秋終自後傳十三君凡二百

五十九年秦滅之

吳自大伯凡十九世至壽夢二年始見於經至魯哀公二十二年歷七君夫差滅

春秋諸侯名字可知者百七十餘國不可盡考此皆  
吳國不可不知其始末也諸國吳最後興曹先滅陳  
次之吳又次之春秋之後蔡先滅齊次之為田鄭晉  
宋魯周楚燕衛以次滅

春秋左氏傳事類始末附錄